

TÍTULO IX. DA AVALIACIÓN POR COMPENSACIÓN

Artigo 48. Do obxecto da avaliación por compensación

Enténdese como avaliación por compensación (AC) o mecanismo polo que se avalía en conxunto a traxectoria académica e o labor realizado por unha ou un estudante ao final dos seus estudos para determinar se acadou os suficientes coñecementos e competencias que lle permitan obter a titulación académica á que opta, compensando materias que non teña superadas.

Artigo 49. Dos requisitos para admitir a trámite as solicitudes

Poderá solicitar a avaliación por compensación o estudiantado de Grao cando cumpran os seguintes requisitos:

- Que cando menos o 50% dos créditos da titulación foran cursados na Universidade de Vigo.
- Que resten para graduarse un máximo de dúas materias que non superen entrambas os 12 créditos, agás o TFG.
- Que o/a estudante esgotara na(s) materia(s) na(s) que solicita a AC cando menos catro oportunidades de avaliación nos tres últimos cursos, e terse presentado nalgunha das oportunidades dispoñibles no curso académico en que se solicite (agás que xa non teña a posibilidade de presentarse por estar matriculado/a nun plan de estudos en proceso de extinción).
- Que a cualificación obtida non fora inferior a 2 ou non avaliado en ningunha das catro oportunidades.

Artigo 50. Das limitacións da avaliación por compensación

- Non serán obxecto de compensación o traballo de fin de grao, as prácticas e o prácticum, nin materias do curso de adaptación ao grao (curso ponte).
- O número máximo de créditos que se poderá conceder por avaliación por compensación na vida académica do alumnado será de 12.
- Non se lle poderá conceder a AC a unha/un estudante que non estea matriculado na(s) materia(s) a compensar no momento de solicitar a AC, agás que a(s) materia(s) estea(n) totalmente extinguida(s).
- As materias compensadas non poderán ser obxecto de recoñecemento noutras titulacións da Universidade de Vigo.
- Non se lle poderá conceder a AC a un/unha estudante ao/á que lle conste algunha sanción grave no seu expediente académico.

Artigo 51. Dos criterios da avaliación por compensación

Concederase de xeito automático o apto por compensación da(s) materia(s) solicitada(s) tras a constatación do cumprimento de todos os requisitos do artigo 49, das limitacións do artigo 50, e sempre que o/a estudante se encontre en polo menos un dos seguintes supostos:

- Que obtivese polo menos unha vez unha cualificación igual ou superior a 4 ou unha media superior a 3,5 entre as dúas mellores cualificacións na(s) materia(s) a compensar.
- Que a media do seu expediente sexa igual ou superior á nota media da súa titulación na última promoción con dereito a docencia.

No caso de que o/a solicitante non se encontre en ningún destes supostos ou curse unha titulación que dea acceso a unha profesión regulada pero reúna todos e cada un dos requisitos do artigo 49, a solicitude será admitida a trámite para que a valore a comisión de compensación.

Naqueles Centros nos que concorran titulacións sen acceso a profesións reguladas pero que compartan bloques formativos (mais dun 50% dos créditos sin contar o TFG) ou teñan establecidos recoñecementos de materias con titulacións que dan acceso a unha profesión regulada, e reúna todos e cada un dos requisitos do artigo 49 para a súa admisión a trámite, serán avaliadas pola comisión de compensación.

A comisión de compensación valorará a traxectoria académica global da/o solicitante e, en particular, na(s) materia(s) obxecto de compensación e nas materias afíns (se as houberse), e analizará canta información complementaria considere oportuna. A comisión poderá solicitarle(s) ao(s)/á(s) docente(s) responsable(s) da(s) materia(s) un informe no cal consten as consideracións relativas a todas as actividades desenvolvidas polo/a estudante (traballos, exames, prácticas etc.).

En ningún caso se lle poderán realizar probas de avaliación ao estudiantado solicitante.

Artigo 52. Da comisión de compensación

1. Todos os centros da Universidade de Vigo contarán cunha comisión de compensación por titulación.
2. A comisión de compensación será nomeada polo centro de adscrición da materia coa seguinte composición tendo en conta a paridade entre mulleres e homes:
 - O decano/a, director/a ou persoa coordinadora da titulación na que delegue, que a presidirá.
 - Tres vogais e tres suplentes pertencentes ao profesorado da titulación. Deberán estar representadas as diferentes áreas de coñecemento que teñan asignada docencia na titulación.
 - Un ou unha vogal e suplente que represente o estudiantado na xunta do centro correspondente.
3. A elección ou designación das persoas que formen a comisión realizarase ao comezo do ano académico e renovarase cada dous anos, sen perxuízo de poder cubrir as baixas que vaian xurdindo.
4. Non poderá formar parte da comisión o profesorado que interviñera na corrección ou avaliación da materia que se solicita compensar. De ser o caso, este deberá ser substituído por outro/a docente designado polo centro.

Artigo 52. Das solicitudes e prazos

A solicitude de AC irá dirixida, por medio dunha instancia da/o estudante, ao órgano de dirección do centro de adscrición da materia. Esta poderá realizarse en cada periodo de avaliación desde a data de apertura de actas ata quince días hábiles despois do peche de entrega das mesmas.

Artigo 53. Do procedemento de resolución e notificación

1. O prazo máximo para resolver será dun mes, que comezará a contar a partir do día seguinte ao remate do prazo de presentación de solicitudes. O mes de agosto considerarase non hábil para os efectos desta resolución.
2. Cando non proceda a admisión dunha solicitude, a xefe ou o xefe da área académica acordará a inadmisión motivada desta e trasladaralle o acordo á/ao solicitante.
3. A comisión examinará todas as solicitudes admitidas a trámite que non sexan de resolución automática, segundo os criterios establecidos no artigo 51.
4. O acordo da comisión remitiráselle ao órgano de dirección do centro, quen ditará a oportuna resolución e comunicarálla mediante un escrito á persoa solicitante; no caso de denegación debe ser motivada. Cando se trate de titulacións que dean acceso a unha profesión regulada a resolución deberá identificar as competencias profesionais vinculadas á materia e cuxa adquisición non quede demostrada que xustifiquen a denegación.
5. A avaliación por compensación figurará no expediente de cada estudante como «apto por compensación» sen cualificación numérica. Para os efectos de baremo do expediente, o «apto por compensación» terá a equivalencia de aprobado coa cualificación numérica de 5.

Artigo 54. Dos recursos

Contra a decisión do centro caberá un recurso de alzada ante o reitor, que actuará de conformidade co establecido no artigo 38.

Artigo 38. Da impugnación do proceso de avaliación e cualificación

1. No caso de resolución desfavorable na reclamación do proceso de avaliación ou cualificación, a persoa interesada poderá recorrer en alzada ante a reitoría nun prazo de dez días hábiles.
2. Unha vez recibido o recurso, a reitoría remitirá toda a documentación á Valedoría Universitaria para que revise o proceso de avaliación e de cualificación.
3. Para revisar o proceso de avaliación e de cualificación, a Valedoría Universitaria poderá realizar todas as actuacións que considere oportunas, incluso nomear un tribunal externo á universidade.
4. Tras rematar as súas actuacións, a Valedoría Universitaria remitirá a súa decisión á Reitoría quen ditará a resolución e notificará á persoa interesada.
5. A resolución da Reitoría esgota a vía administrativa.

DISPOSICIÓN TRANSITORIA

Durante o primeiro ano de vixencia da presente normativa, o requisito temporal establecido no artigo 49 c) non se aplicará ao alumnado que, podendo ter solicitado a avaliación por compensación con anterioridade á dita entrada en vixencia, non o fixera.